

PAS: Jangan serang Pak Samad hanya untuk alih isu minyak
Malaysian Insider
Sept 5 , 2013
OLEH MD IZWAN

PAS mengecam tindakan melampau kerajaan dan pihak berkuasa terhadap Sasterawan Negara, Datuk A Samad Said yang dianggap sebagai cubaan mengalihkan pandangan rakyat terhadap isu kenaikan harga minyak.

Ketua Penerangan PAS, Datuk Tuan Ibrahim Tuan Man (gambar), berkata tindakan ugutan untuk menarik balik gelaran Sasterawan Negara adalah satu penghinaan kepada Samad yang banyak menyumbang kepada negara.

"PAS melihat ada pihak yang semakin rancak bertindak melampau terhadap sasterawan negara itu.

"Kenyataan Datuk Seri Ahmad Shabery Cheek yang berkata kerajaan tidak menolak kemungkinan menarik balik gelaran Sasterawan Negara daripada A Samad Said sangat menghina," katanya.

Tuan Ibrahim berkata, layanan hina sedemikian hanya semata-mata kerana Samad tidak menyokong kerajaan, bukan kerana kebenaran yang dinyatakan sasterawan itu.

"Apakah kerajaan boleh menidakkan sumbangan Pak Samad memperkaya dan memartabatkan kesusasteraan Melayu hanya kerana apa yang diperjuangkan Pak Samad kini tidak mesra kerajaan," katanya.

Beliau berkata, kerajaan ketika ini terdesak dengan tekanan oleh rakyat yang semakin marah ekoran kenaikan harga minyak sehingga terpaksa mengalihkan isu itu dengan menyerang Samad.

"Kerajaan BN disaran jangan cuba mengalih perhatian daripada isu peningkatan harga minyak dengan memangsakan Pak Samad dengan apa jua alasan.

"Tindakan kerajaan salah saja tangkap, salah sikit tangkap benar-benar menjadikan Malaysia negara polis. Sedangkan dialog, perbincangan dan pelbagai medium boleh digunakan bagi menjernihkan keadaan," katanya.

Semalam, Samad ditahan polis di rumahnya di Bangsar, kira-kira jam 12.40 pagi dan dibawa ke Ibu Pejabat Polis Daerah (IPD) Dang Wangi, Kuala Lumpur untuk membantu siasatan berhubung pengibaran bendera Sang Saka Malaya.

Namun, orang ramai termasuk pemimpin politik dan aktivis menyelar tindakan pihak polis tersebut sebagai tidak beradab dan menghormati seorang yang berusia dengan menahannya lewat pagi.

Sasterawan negara itu disoal siasat selama hampir dua jam selepas tiga anggota polis mengambilnya di rumah berhubung insiden pada malam ambang kemerdekaan ke-56 di Dataran Merdeka, Kuala Lumpur.

Samad disiasat mengikut Seksyen 4 Akta Hasutan dan Seksyen 505, Kanun Keseksaan. – 5 September, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/pas-jangan-serang-pak-samad-hanya-untuk-alih-isu-minyak>